

Utoqqalinersiaqarneq pillugu Namminersorlutik Oqartussat nalunaarutaat

Utoqqalinersiaqarneq pillugu Inatsisartut inatsisaat nr. 20, 23. november 2015-imeersumi § 1, imm. 4, § 13, imm. 5, § 17, imm. 7 naapertorlugu aalajangersarneqarput:

Aningaasaqarnermut tapeq

§ 1. Pissutsini ataasiakkaani nalilersuereernikkut aningaasaqarnermut tapimik tamakkiisumik ilaannakortumilluunniit ukununga matussusiinissamut kommunalbestyrelsi tunniussisinnaavoq:

- 1) ineqarnermut akiliummut aningaasartuutitut,
- 2) imeqarnermut, innaallagiamut, kiassarnermut, eqqagassalerinerimut, uuliamut il.il. aningaasartuutitut, aamma
- 3) aningaasartuutit pinngitsoorneqarsinnaanngitsut, illumik iluarsaasinerit aammalu kissarsuutitik iluarsaasinerit il.il. piaartumik isumannaartariaqartut.

Imm. 2. Utoqqalinersiaqartumut aningaasaqarnikkut immikkut ittumik ajornartorsiuteqartumut imaluunniit utoqqalinersiaqartoq aningaasaqarnikkut annertuumik ajornartorsiuteqalernissaa ilimanaateqarpat aningaasaqarnermut tapeq taamaallaat tunniunneqarsinnaavoq.

Imm. 3. Aningaasaqarnermut tapeqarnissamik qinnuteqaatip nalilersornerani immikkut aamma aningaasaqarnikkut immikkuullarissumik utoqqalinersiallit allat atugaannik allaanerusumik utoqqalinersiallip atugaqarnera kommunalbestyrelsip ilaatigut pingaaruteqartutut isiginiarsinnaavaa. Aapparissamut imaluunniit nalunaarsukkamik aapparissamut pilersuisussaataaneq taamattaq pingaaruteqartutut isiginiarneqarsinnaavoq.

Imm. 4. Aningaasaqarnermut tapeq ataasiartumik tapitut tunniunneqassaaq. Pissutsini immikkuullarissuni aningaasaqarnermut tapeq piffissami qaammatit pingasukkaartumik sivisunerpaamik sivisussusilerneqartumut tunniunneqartarsinnaavoq.

Imm. 5. Aningaasaqarnermut tapeqarnermut aalajangiinermi allassimasassaaq utertitsilluni akileeqqusisoqassanersoq imaluunniit utertitsiluni akileeqqusinertaqaanngitsumik tunniussisoqartoq.

§ 2. Illorisamut, biilerisamut, angallatigisamut il.il. pitsanngorsaanissamut imaluunniit aserfallatsaaliinissamut aningaasartuutitut siunertaqartumik aningaasaqarnermut tapeq tunniunneqarsinnaanngilaq.

Saniatigut tapeq

§ 3. Aningaasat nammineq atorsinnaasat annertussusissaat pillugit sumiiffigisami inuuniarnikkut pissutsit aallaavigalugit kommunalbestyrelsi aalajangiissaaq.

Imm. 2. Aningaasat nammineq atorsinnaasat tassaapput utoqqalinersiaqartup isertitai maanna atuuttut

akileraarusererlugit, aamma aningaasartuutit makku ilanngaatigereerlugit sinneruttut:

1) Nammineq najugarisamut aningaasartuutit imaluunniit inissiani attartortittakkani ineqarnermut akiliutit ineqarnermut tapiissutit ilanngaatigereerlugit.

2) Imeqarnermut, innaallagiamut, kiassarnermut, eqqaagassalerinnermut, uuliamut il.il. aningaasartuutit.

Imm. 3. Saniatigut tapinut tunngavigineqartuni allannguuteqarpat, utoqqalinersialimmut saniatigut tapiliunneqartut nalimmassarneqassapput, utoqqalinersiallip aningaasat nammineq atorsinnaasaani aallaavigineqartuni tunngavigineqartuni allannguuteqartitsisupput.

Paaqqinnittarfinni il.il. angerlarsimaffiup avataani inissisimaneq

Isumaginninnermi ulloq unnuarlu angerlarsimaffimmi inissisimanermi nammineq akiliisarneq

§ 4. Utoqqalinersiaqartoq nammineq isertitaqarpat isumaginninnermi ulloq unnuarlu angerlarsimaffimmi inissisimaneq tamakkiisumik ilaannakortumilluunniit nammineq akilerneqassaaq. Utoqqalinersiat ilanngullugit saniatigut isertitat akileraaruserneqartut 60 pct.-ii akiliutit qaangersinnaanngilaat.

Imm. 2. Isumaginninnermi ulloq unnuarlu angerlarsimaffimmi inissisimanermi aningaasartuutit toqqaannartumik attuumassuteqartut akiliutigineqarnissaat taamaallaat piumasarineqarsinnaavoq.

Pisortat paaqqinnittarfini inissisimanermi utoqqalinersianit ilanngaassisarneq

§ 5. Kaasarfimmiut, akissarsiat imaluunniit pisortat aqutigalugit sammisassaqaartitsinnermit akissarsiat utoqqalinersianit ilanngaatigineqassapput. Taamaattoq ilanngaassereernerup kingorna utoqqalinersiaqartoq minnerpaamik toqqammaviusumik aningaasartat 46 pct.-iinut annertussuseqartunut nallersuuttunut aningaasaateqartinneqassaaq.

Ukiut utoqqalinersiaqarfusut qaffanneqarnerinik kinguartitsineq

§ 6. Ukiut utoqqalinersiaqarfusut qaffanneqarnerinik kinguartitsinissamik qinnuteqaateqartoqareernerani kommunalbestyrelsi aalajangiisuussaaq, tak. utoqqalinersiaqarneq pillugu Inatsisartut inatsisaanni § 1, imm. 2 aamma 3.

Imm. 2. Qinnuteqaateqartup sulisimanerata sivilissusaa naatsorsorneqassaaq piffissaq ataavartumik suliffeqalerneraniit piffissamut qinnuteqaateqarnerata tungaanut. Qitornartaarsimalluni sulinnigiffeqarneq, pikkorissarneq aamma ilinniaqqinneq, tunisassiassanik amigaateqartoqarnera aamma sikusimaneq pissutigalugu, allatulluunniit nammineq pisuussutiginnisamik pissutigalugu piffissami suliffeqarsimannginneq naatsorsuinnermut ilaatinneqassapput. Sulisimanerup sivilissusaata naatsorsorneranut ilaatinneqassanngillat suliffeqarsimannginnerit aamma qinnuteqaateqartup piffissani suliffissarsiorsimannginneri.

Imm. 3. Ukiut utoqqalinersiaqarfusut qaffatsinneqarnissaasa kinguartinneqarnissaanut piumasaqaataavoq timikkut imaluunniit tarnikkut sulerulunnerup kinguneranik atuussinnaassutsikkut annikillitsisimanissaq aammalu sulisinnaassutsikkut atuussinnaassutsip annertuumik killilerneqarsimanissaa.

Imm. 4. Piffissaq katillugu sulisimaneq, suliffiup suussusaa aamma sivilissusaa pillugit uppersaattissanik pisariaqartunik kommunalbestyrelsip qinnuteqaateqartoq pissarsiniarnissaanik piumasaqaateqarfigisinnaavaa. Atuussinnaassuseq pillugu uppersaammik qinnuteqaateqartoq pissarsiniarnissaanik aamma qinnuteqaateqartup siusinnerusukkat sulinerata atuussinnaassusaatalu

annikillisimaneranut attuumassuteqartumik patsiseqarnera pillugu kommunalbestyrelsi
piumasaqaateqarsinnaavoq.

Naammagittaalliorsinnaaneq

§ 7. Nalunaarut manna malillugu aalajangiinerit Isumaginnittoqarfiup aqunneqarnera
aaqqissuussaanelu pillugit malittarisassat sukkulluunniit atuuttut naapertorlugit Isumaginninnermi
Naammagittaalliuuteqartarfimmut naammagittaalliuutigineqarsinnaapput.

Atuutilerfia

§ 8. Nalunaarut atuutilerpoq 1. januar 2016.

Namminersorlutik Oqartussat, ulloq 29. december 2015

Martha Lund Olsen

/

Julie Præst Wilche

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut